

Generaziuns: Uffants – scola – giuvenils – emprendissadi

«Cuntrasts» da la Televisiun Rumantscha sin DVD, part 2

Da la muntogna en la citad: trais viadis da scola

Sin mes emprim viadi da scola sun jau stà sin l'insla Mainau, ed anc oz ma regord jau bain da questas bleras impressiuns che jau hai gi sin quest viadi. Las davosas emnas en puspè fullas d'uffants stads sin lur viadis da scola. Ed uschia hai jau premdi mia camera ed accumpagnà ils uffants. Quels da la 5avla e 6avla classa da Sent a Turitg, quels da las emprimas classas da Donat a Lugano e quels da la davosa secundaria e reala da Rueun a Minca. (Emissiun dals 3 da fanadur 2011, redacziun: Eligi Derungs).

«Mo il tic tac da l'ura» – Duin, la pli pitschna scola cumplexiva rumantscha

Duin, la pli pitschna scola cumplexiva rumantscha – sin visita durant in onn. Jau ma regord anc bain da l'atun 1967,

mes emprim di da scola: Tut gnervus e cun in turnister da tgiorn spetgava jau avant chasa sin mes collegas Remo e Marco. Agitads e plain meraviglias essan nus marschads vers la chasa da scola. L'emprima classa aveva 14 scolars, 7 mattatschas e 7 matatschas. Uss, prest 50 onns pli tard, carmala la stanza da scola puspè mai. La scola da Duin è numnadain la pli pitschna scola cumplexiva rumantscha. Vul dir: ina stanza, in scolast, 2 solaras e 6 scolars in quatter classas. Durant in onn da scola observ jau cun mia camera il far e demanar dals scolars. Jau sun in dad els e lasch viver ils muments durant chant ed istruzziun, il di ch'els rimnan palpiri ed jau vom cun els sin viadi da scola. E lura, in mument tut spezial, durant la surdada da l'attestat da Florian, Josa, Linda, Livio, Lorena, Nico, Patric e Tizian sun jau da la partida. (Emissiun dals 13 da settember 2015; redacziun: Eligi Derungs).

La scola en il spazi alpin. Vias e visiuns

«Baselgia, scola ed ustaria, quai dovra in vitg», quai udiv'ins adina e dapertut. Per il Grischun, il chantun da muntogna cun vitgets allontanads e cun las 150 valladas, ha quest verset gi dubla paisa. Quest motto è lura er vegni vivì fin ils onns 1980. Mintga vitg aveva sia scola. Ma lura han ellas cumenzà a svanir, bleras ed andetgamain. «La scola cumplexiva valia pauc, ins stuessi far sco en la citad», uschia avevi tuttenina num. Ma uss ves'ins puspè las valurs da la scola cumplexiva, quai betg mo en muntogna. (Emissiun dals 27 da november 2011, redacziun: Gion Tschuor).

Tia scola è er mia scola – Integraziun per tut pretsch?

Livio ha 6 onns, ha il sindrom da Down e va a scolina a Rueun – a scolina tut normal. Pli baud avess el betg pudì ir a scola cun sias camaratas e camarats dal vitg. Livio avess stuì ir en ina scola speziala. Tenor la nova lescha da scola ha mintg'uffant il dretg da vegnir scolà en la scola da l'agen vitg. Cun Livio guardain nus co che quell'integraziun vesa or, tge che funcziunescha e nua ch'èn ils craps da stargpitsch. (Emissiun dals 6 d'october 2013, redacziun: Eligi Derungs).

Ursina Niggli – giuvna cun il sindrom da Down

Cur che Ursina Niggli da Segl è ida en l'emprima classa, è ella stada ina pioniera. Avant 9 onns è ella stada in dals emprims uffants cun impediment ch'è stà integrà cumplainmain en ina scola dal vitg en il chantun Grischun. La Televisiun Rumantscha aveva visità alura Ursina Niggli. En ils Cuntrasts vesais vus co ch'i va oz cun Ursina Niggli e tge ch'ella fa. (Emissiun dals 21 da mars 2010).



Il temp da scolina e da scola – impurtants pass da socializaziun e d'emprender per la vita.

FOTO: PD

In pass lung

Corsin Höfli da Zernez ha 15 onns. Ses cor batta per il passlung. Durant ils ultims onns è Corsin stà in dals megliers passlungists grischuns da si'annada. Las aspectativas envers el e sias prestaziuns sportivas en stadas autas fin l'onn passà. Lura è el vegni malsau ed ha survegni la diagnosa: leuchemia limfatica acuta, cancer dal sang. Giuvens e giuvnas cun leuchemia limfatica acuta han ina schanza da surviver da 50 %. Flurina Badel ha fatg in film davart Corsin e sia leuchemia ed ha dà ad el ina camera per ch'el possia er documentar sez ses mingadi cun e cunter la malsogna maligna. (Emissiun dals 27 d'avrigl 2008, redacziun: Flurina Badel).

Giuventetgna & alcohol – la droga numer 1

Quest film na mussa betg il meglier maletg da la giuventetgna. Anzi: el mussa in maletg per part schoccant, in maletg che vegn regularmain sin il frontispizi da las medias – la giuventetgna che baiva alcohol. La giuventetgna dad ozendi baiva sturn, fa «teschas», fa si ina «setga» u fa ina «schimgia». Curt: anc adina è l'alcohol la droga numer 1 tar la giuventetgna. Ma tge è auter che pli baud? Peter Kreiliger ha visità ils «Botellónes» dal Grischun. (Emissiun dals 19 d'october 2008, redacziun: Peter Kreiliger).

Giuventetgna e bellezza

I cumenza davant la stgaffa da vestgadira e finescha cun sa desmincar – il tema sa far bel, esser bel, la bellezza insumma occupa ils giuvenils da la damaun meravigl fin la saira tard. Tge marca purtar per esser acceptà tar ils collegas? Quant bass purtar las chauschas per ch'ins è

anc cool? E co ir enturn cun ideals da bellezza che pretendan ch'ins saja satigl? 33 giuvenils rumantschs han respundi tge ch'els pensan propi davart il tema bellezza. (Emissiun dals 2 da mars 2008, redacziun: Isabelle Jaeger).

Giuventetgna ed esters

«Ti Jugol!» – quest num per migrants e migrantas dal Balcan vegn duvrà oz da blers giuvenils svizzers sco insulta. Ils resentiments pertugan dentant betg mo persunas da l'antieriura Jugoslavia. La svalitaziun e diffamaziun da persunas e gruppas da l'exteriur para ozendi bunmain normala. Il film «giuventetgna ed esters» fa part da la seria davart ils temas brisants da la giuventetgna. Qua vegnan ils giuvenils sez a pled e dattan in maletg differenzià da la situaziun actuala. (Emissiun dals 6 d'avrigl 2008, redacziun: Peter Kreiliger / Mirco Manetsch).

Mes emprim onn en il convict

In'istorgia giuvna cun ed or dal diari dal giuven Maurus Derungs da Vignogn. Maurus ha 15 onns ed avant in onn ha el bandunà la Val Lumnezia per cumenzar la Scola chantunala a Cuira. A Cuira prenda el dimora en il convict, là nua che la gronda part dals scolars abiteschan durant l'emna sch'els na pon betg turnar a chasa la saira. Il cineast Ivo Zen ha accumpagnà Maurus Derungs en quella fasa da midada – la midada dal dachasa – la midada dal conturn e la tschertga da novs amis. (Emissiun dals 6 da schaner 2008, redacziun: Ivo Zen; er cumpari en vendita sut il titel «Maurus, Nadia, Flurina»).

«Tegna la dira!» Ir en piazza ier ed oz

Nua es ti stà en piazza questa stad? Avant in pèr onns era quai anc il tema numer in

ils emprims dis da scola. Mintg'uffant da scola che n'aveva betg da gidar a chasa aveva dad ir insanua en piazza e quai a partir d'avrigl fin l'october. La paja era savens pauc dapli ch'èn grazia fitg, era però tuttina in sustegn per las grondas famiglias muntagnardas. «Uschè ditg che ti has da mangiar, mo tegna la dira» – quai devan ils geniturs savens anc sin viadi als uffants. Ozendi van be paucs uffants anc en piazza, ed er per quels che van en las relaziuns sa midadas. (Emissiun dals 7 da settember 2008, redacziun: Eligi Derungs).

In sigl or en la vita

La cineasta Menga Huonder-Jenny ha accumpagnà durant in onn set giuvens e giuvnas sin la tschertga per ina piazza d'emprendissadi. Naschi è in film giuven e frestg cun maletgs commovids. Malgrà sia levezza reusseschi al film da mussar ils embrugls che tschiffan ed occupan ils giuvenils sin la sava en il mund dals creschids. Il film mussa co ch'ils giuvens e las giuvnas vegnan confruntads cun trumpadas e cupitgadas, co ch'els emprendan da surpigliar responsabladad e d'adina puspè s'orientar da nov. (Emissiun dals 2 da schaner 2011, redacziun: Menga Huonder-Jenny).

La mostra

In giuven um da 18 onns cun il numer 410 sin il tricostat sin ina chomma amez in rintg en la sala da gimnastica. In'infrastructura cumonda da serrar ils egl e curt suenter da laschar pender il chau davos giu. In mument po el tgnair l'equiliber, ma lura cupitga el. «30,5» constatescha l'infrastructura. L'exercizi bizar pussibilitescha da valitar cun ina cifra la coordinaziun dal giuven. El sto far «la mostra», la recrutaziun, ensem cun 65 auters che

derivavan dals chantuns Grischun, Son Gagl ed Appenzell. Durant dus dis ston els far tests da sport en il center da recrutaziun a Mels e laschar examinar lur sanadad fisica e psichica en numerus exercizis. Al computer ston els responder nundumbraivlas dumondas intimas che duain permetter da dir schebain els sajan «tauglich» u «untauglich», pia abels da far servetsch militar u betg. Ma sch'els hajan er veglia da far militar na dumonda naging. Lezza dumonda ha Martin Cantieni fatg a Markus Baumann, da Bever, Lucian Bischof da Cuira/Ladir e Joel Denzler da Buchs/Sent. (Emissiun dals 23 da favrer 2014, redacziun: Martin Cantieni).

Las dialas da l'hotel

Avant trais onns han cumenzà Carmen Caduff da Tavanasa, Laura Derungs da Ftan, Corina Manetsch da Mompé Medel, Onna Pfister da Schlans ed Ursina Tiri d'Andeer la scola per gastronomia a Passugg. Questas tschintg giuvnas rumantschas en sa decididas per ina clamada ch'è en il Grischun en sa sez fitg impurtanta, ma tar indigenas betg zunt tschertgada. La Televisiun Rumantscha ha accumpagnà ellas da l'emprim di da scola fin tar la surdada dal diplom da gastronomas l'emna passada. (Emissiun dals 5 da fanadur 2009, redacziun: Ruedi Bruderer).

Las emprimas

Exact avant 30 onns hai dà a la scola da la claustra da Mustér in onn da matura istoric. L'onn 1979 han las emprimas mattatschas pudì far matura al gimnasi da Mustér. Durant decennis pudevan mo mattatschs ir là a scola. Diesch mattatschas en stadas en l'emprima classa maschadada. Per ses film «las emprimas» è Petra Giger ida a la tschertga da questas diesch dunnas. Ella è ida a guardar tge ch'è daventà dad ellas, tge muntada che quai ha gi per ellas da pudair far la matura a Mustér e co che quai è stà dad esser stadas las emprimas. (Emissiun dals 21 da zercladur 2009, redacziun: Petra Giger).

Gieri il strolì

Pli baud era Gieri Cathomas da Sumvitg in strolì – in detg strolì – e quai era enconuscent en ses conturn. Oz è Gieri Cathomas (36) manager da si'atgna fatschenta. Ensem cun trais auters acziunaris ha el fundà «Doublecheck», in center da sanadad che sa concentrescha sin pazients da l'exteriur. Studegià ha Gieri Cathomas medischina. Cun la medischina n'ha el dentant da far nagut en sia fatschenta. Sia sparta è acquirir novs clients e tgirar contacts. Co che la lavur da Gieri Cathomas vesa or exact e co ch'el fa anc oz il strolì, mussa quest purtret filmic. (Emissiun dals 15 da schaner 2012, redacziun: Petra Rothmund).

Daco betg? –

Duas generaziuns s'entaupan

«Giuven e vegl na sa chapeschan betg pli» – peds ch'ins auda adina puspè. È quai be in clischù, in pregiudizi che vegn raquintà da generaziun a generaziun, u èsi propi vair. Carin Camathias è sa fatschentada cun la dumonda da las generaziuns ed ha discurt cun giuvens e cun pli vegls, cun ina tatta e ses biadi, ed ella ha er organisà in inscunter tranter duas generaziuns, tranter persunas che sa vesan per l'emprima giada. «Daco betg? – duas generaziuns s'entaupan». (Emissiun dals 17 da favrer 2008, redacziun: Carin Camathias).

La presentaziun:

«Cuntrasts» da la Televisiun Rumantscha: Films emess ils onns 2007–2015, accessibels en la Biblioteca chantunala en format DVD.

Dapli infurmaziuns:

chatta.ch/?hiid=4733
www.chatta.ch



Onns da giuventetgna – il lung process vers l'atgna independenza.

FOTO: PD